

Powšitkowne WOZJEWJENJA

njedźelu, 9. nowembra 2014

Patronatne kemše w Njebjelčicach

Patronatna Boža mša na swjateho Měrcina budže wutoru, 11. nowembra, w 9 hodź. w Njebjelčicach. Swjedźenske předowanje změje Budyski tachantski farar Wito Sćapan. Po kemšach móža so wěriwi z relikwiju swjateho Měrcina žohnować dać.

TCM – „Łužica pomha“ prosy wo dary za Krupku

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ wobnowjenje kapałki ze studničku swjateje Marije w Krupce podpěrać. Na tu- te putniske městno putnikuja młodži a starši katolscy Serbja kóždy lěto pěši, z kołom, awtom abo busom. TCM prosy wěriwych wo šćedriwe dary na konto Cyrill-Methodius-Verein, IBAN: DE65 750 90 300 000 828 23 66, BIC: GENO DEF1 M05 pola banki Liga pod hesłom „Łužica pomha“.

J. Špitank, předsyda TCM

Nyšpor a procesion ze swěčkami w Róžeńće

Towarstwo Cyrila a Metoda z.t. přeprošuje wěriwych ze wšitkich wosadow na pokutnym dnju srjedu, 19. nowembra, w 16 hodź. k nyšporu do Róžanta, kotremuž přizamknje so procesion ze swěčkami. Z tym ma so džakować za měrliwy politiski přewrót před 25 lětami, spominać na spočatk Prěnjeje kaž tež Druheje swětoweje wójny, prosyc wozdźerženje hnadowneho městna Róžanta a Božeje přirody we Łužicy kaž tež wo měr a pokoj na zemi.

Zetkanje samostejacych

Samostejacy ze serbskich wosadow su na zetkanje wutoru, 2. decembra, w 14 hodź. do Domu biskopa Bena w Smochćicach přeprošeni. Zajimcy njech so hač do štwórtka, 27. nowembra, w redakciji Katolskeho Posoła přizjewja, telefonowe čisło (0 35 91) 55 02 12. Štóz chce wotewzaty być, njech to prošu zdžěli.

Zhromadny dzeń přenjowoprawjenskich džěci

Dekanatne dušepastyrstwo přeprošuje wšitke džěci, kotrež so na přenje swjate wo- prawjenje přihotuja, na zhromadny dzeń pod hesłom „Cool kadla – fecich holca“ srjedu, 19. nowembra, wot 9.00 do 15.00 hodź. do Njebjelčic. Započatk je z Božej mšu w cyrkwi. Zajimcy njech so prošu hač do pónđzele, 10. nowembra, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk, kotryž wučinja tři eura.

Komedija w Radworju

Dalše předstajenje komedije „Jedyn Šwjerčik přińdže zředka sam“ budže njedźelu, 9. nowembra, w 16 hodź. w Radworskim hosćencu „Meja“. Hrajerjo Chróšćanskeje džiwadłoweje skupiny wšitkich wutrobnje přeprošuja.

Spominanje na dr. Měrcina Völkla

Składnostnje 80. posmjertnych narodnin dr. Měrcina Völkla zetkaja so jeho česćowarjo a přećeljo njedzelu, 16. nowembra, po dopoldnišich kemšach w Chrósćicach, kotrež su w 9 hodž., při jeho rowje na tamnišim kěrchowje. K tomu přeprošuje Maćica Serbska, kotruž je wón po politiskim přewróće znova založil a kotrejež předsyda je wjele lět był. K jeho wopominanju porěči Maćicar a jeho šulski towarš Jurij Šořta-Nowowješčanski.

Hromadza hodowne dary

Towarstwo swjateje Filomeny z.t. chce tež lětsa džěci a swójby w čěskim Dolním Podluží, w bołharskim měsće Razgradze a wokolnych wsach z hodownymi pakćikami zwjeselić. Jich wobsah njeje předpisany. Wotedać móža so pakćiki wot póndzele do štwórtka, 17. do 20. nowembra, stajnje wot 17 do 18 hodž. w Smjerdžečanskim kulturnym domje. W tutym času přijimuju tohorunja derje zdžeržanu drastu a počehnjenja. Dalša móžnosć podpěry su pjenježne dary, z kotrychž ma so transport financować kaž tež wšelake socialne zarjadnišća podpěrać. Přepokazać móža so na konto St. Filomena Verein e.V., IBAN: DE45 855 90 000 037 262 47 01, BIC: GENO DEF1 BZV pola Ludoweje banki Budyšin e.G. pod hesłom „Razgrad“ abo „Dolní Podluží“.

Gerat Róbl, předsyda towarstwa

Hłowna a wólbna zhromadźizna Bratrowstwa

Wšitcy člonjo a zajimcy su wutrobnje přeprošeni na hłownu a wólbnu zhromadźiznu Bratrowstwa. Wona budže wutoru, 18. nowembra, w 19 hodž. na wjesnej žurli w Salowje.

Zhromadny čas jeniče z papu w Smochćicach

Pod hesłom „Papa, powědaj raz!“ su nanojo ze swojimi džěcimi wot pjatka do njedzele, 21. do 23. nowembra, do Domu biskopa Bena w Smochćicach přeprošeni. Tam móža zhromadnje rjanej dnjej přežiwić. Planowana je na přikład slědženska rally po Budyšinje, kotrejž přizamknje so wopyt jedneje z wjele wěžow města. Wosebje wažne pak je zarjadowarjej, zo mataj nan a džěčo čas za sebje. Zajimcy měli so w Smochćicach přizjewić, telefonowe čisło (03 59 35) 2 23 17. Tam zhonja tež dalše nadrobnosće.

Tydzeń džědow a wowkow ze swojimi wnučkami

„Tak pisane je naše žiwjenje!“ rěka hesło tydženja džědow a wowkow ze swojimi wnučkami w předšulskej starobje, na kotryž Dom biskopa Bena w Smochćicach wšitkich zajimowanych wutrobnje přeprošuje. Zhromadne dny budu wot póndzele do pjatka, 17. do 21. nowembra. Přizjewjenja su móžne w Smochćicach, telefonowe čisło (03 59 35) 2 23 16. Tam dóstanu zajimcy tohorunja nadrobnije informacije.